


Landador Jordy Groters ta cla pa e Weganan Olimpico Hubenil 2014 di Nanjing, China



Sin duda algun Jordy Groters ta un di e talentonan di mas grandi cu e deporte di landamento a conoce den e ultimo diez añanan. A pesar di ta ainda un atleta hoben, ya caba Groters a participa den varios competencia riba nivel halto den exterior y a sa di gana numeroso medaya den competencianan local y internacional. Actualmente Groters ta residencia na Merca unda ultimo hasta ela logra wordo nombra como e mihor landador den e estado di Florida, esaki pa un di e corantnan di mas grandi di e estado cu ta Sun Sentinel. Recientemente Jordy a competi cu e seleccion di Aruba den e campeonato di Carifta 2014, teni aki na Aruba mes. Mester bisa cu n bez mas Jordy tabata un pieza clave, mirando e resultadonan, y a yuda guia e equipo di Aruba na un segundo lugar den e campeonato di Caribe cu 18 pais participando. Dentro di algun luna Jordy Groters lo ta compitiendo pa Aruba den e Weganan Olimpico Hubenil 2014 na Nanjing, China, pa cua ela clasifica den tres diferente evento cu un tempo A, esaki como e unico landador di Aruba cu a logra esaki te cu awor. Dos di e tres temponan aki Jordy a logra durante di campeonato di Carifta 2014 teni na Aruba. Na Nanjing, Jordy lo competi den e 50m Breaststroke, unda ela logra marca un tempo di 29.17 bon pa un tempo A, durante di e 4TH FINA JUNIOR WORLD CHAMPIONSHIPS. Tambe Jordy a clasifica den e 100m Breaststroke den un tempo di


1:04.25 y e 200m Breaststroke den un tempo di 2:20.18, ambos logra durante di e CARIFTA SWIMMING CHAMPIONSHIPS 2014 na Aruba. Ta bon pa mencionar cu Jordy tin tres tempo B tambe pa loke ta e clasificacion pa e Youth Olympic Games, esakinan den e 50m y 100m Freestyle como tambe den e 200m Individual Medley. Pa e motibo aki nos realisa un entrevista cu Aruba su top-landador Jordy Groters unda nos a puntre con ta bayendo na Merca y cu su preparacion pa cu e Weganan Olimpico Hubenil di Nanjing, China.

Segun Jordy, tur cos ta bayendo bon cune na Merca, e ta den su ultimo aña di High School. Ela caba di haci e temporada di "high school swimming", unda ela scohe pa dos evento pa landa cu ta e 50m freestyle y e 100m breaststroke. Mester bisa cu den e dos eventonan ey, Jordy a logra bira campeon di e estado Florida, estableciendo dos tempo fenomenal. Pa cu esaki el a haya e titulo como e mihor landador di aña, un reconocimiento cu a bini for di e corant grandi den Florida, esta Sun Sentinel. Den luna di december, Jordy a competi den e campeonato nacional teni na South Carolina unda ela ocupa un di dos lugar den e 100m schoolslag, un logro cu a ocupa e dos lugar di henter Merca den e evento aki. Awor Jordy ta prepara pa drenta un reto nobo, unda ela scohe pa join e Universidad di Missouri, aki elo landa y studia. Jordy tabata tin opcion pa scohe den no menos cu cinco scol, pero a dicidi di pone su confiansa den e esun di Missouri. Segun Groters e universidad di Missouri ta esun mas perfecto pe, elo sinti su mes na cas y eyan e lo drecha su landamento y sigur lo crece como persona. Pa loke ta Jordy Groters su preparacion pa e Weganan Olimpico Hubenil 2014 di Nanjing, China, ela conta nos cu esaki ta bayendo bon, awor ela clasifica den e 50m, 100m y 200m schoolslag tur tres den tempo A, mientras den tempo B, e tin 200 schoolslag, 50m y 100m freestyle y 200IM. Den e



50m schoolslag, Jordy ta logra un tempo di 29.17 cual ta un tempo cu ta pone den e top 13 landadornan cu lo competi den e Weganan Olimpico Hubenil, cual segun Groters ta uno fenomenal. Durante di e Carifta 2014, Jordy a busca tres clasificacion mas den tempo A.

Na e pregunta kiko lo bira e aspiracion di Jordy Groters na e Weganan Olimpico Hubenil, esaki a bisa cu aña pasa ela competi den e campeonato mundial hubenil na augustus unda ela logra ocupa un di 21 lugar cual e tabata satisfecho cune, aunke e lo kier a yega un semi-final cual no a logra. Pero pa e Weganan Olimpico Hubenil cual ta net un aña despues, Groters tin sigur cu elo yega un semi-final y hasta



kizas un final.

Por ultimo Jordy a indica cu e plan grandi pa su scol nobo, esta Missouri ta pa logra clasifica pa e Weganan Olimpico di Rio 2016. Den esaki nan lo yuda Jordy clasifica den e disciplina di schoolslag, nan lo yude y guie pa asina e logra su soño.

Te asina leu nos entrevista cu e top landador di Aruba, residencia na Merca, Jordy Groters. Nos kier a desea Jordy tur clase di exito den su aña escolar nobo na Missouri. Y sigur tambe durante di e Weganan Olimpico Hubenil di Nanjing, China unda elo competi den tres evento di schoolslag.

